

Date – 29/09/2025
Time - 07:30 -07:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Chief Minister Pu Lalduhoma chuan BSF hna lak kal mek ngaihven turin Mizo tlangval te a sawm.
2. Comptroller & Auditor General of India (CAG) audit report chuan Power & Electricity Department a hnathawk 6-te'n hna an thawk lo chung a hlawh cheng nuai 80 sing 8 leh sang 8 pek an ni chu na takin a sawisel.
3. Prime Minister Narendra Modi chuan ram intodelh chu ramchhung thilsiam lei tam chauhin a theih a ni a ti
4. Nizana Asia Cup final khelh zawh takah India chuan Pakistan wicket ngaa hnehin an champion.

<><><>

CM - BSF

Chief Minister Pu Lalduhoma chuan BSF hna lak kal mek ngaihven turin Mizo tlangval te a sawm.

Social media kaltlangin he thu hi sawiin Chief Minister chuan BSF recruitment kalpui mek chu Mizo thalaiten beisei angin an bengkhawn tawk lo hle a a hriat thu leh pawh a tih thu a sawi a. Ramri veng tur, ram tana ngaihtuahna seng mi, ram hmangaih mi an luhna atana an duh a nih thu a sawi sawiin recruitment chu kalpui mek a la nih avangin Mizo tlangval te he hun remchang hi hmang tangkai tura a duh thu a sawi a ni.

Hei bakah hian Mizo hlang battalion, Territorial Army neih a nih dawn thu leh recruitment pawh tih tep a nih thu a sawi a. Aizawla leh Lungleia recruitment huaihawt turin company khat ve ve an rawn luh tawh thu sawiin Champhaiah company khat awmna tur ngaihtuah leh mek a nih thu a sawi a. Territorial Army atan hian a tirah battalion din nghal thut theih a nih loh thu leh a tirah mi 150 lak phawt an nih dawn thu a sawi a. Hemi hnuah hian hmeichhe tan pawh an la dil zui zel dawn thu a sawi a ni.

Chief Minister chuan Territorial Army chu battalion puitling la ni chho tur, an awmna hmun nghet tur pawh la ngaihtuah zel tur a nih thu a sawi a. Ramri hrula duty tur, thu pawimawh te lakhawma sorkar mit leh beng ber tur an nih thu leh an pawimawh thu a sawi a. Thalaite tha tak tak thawk thei tur an awm tih a hriat thu leh thahnemngai taka ngaihven ngei tura a duh thu a sawi a ni.

Hetih lai hian Lunglei a kan Corr sawi danin Lunglei a Lena stadium-a Lunglei, Lawngtlai, Siaha leh Hnahthial District ami BSF lakna a inlan tuma inziaklut hi an tam lo hle a. October ni 9 nghak thleng lovin ni 3 thleng taksa

endik kalpui a ni dawn a. Diltu zingah hian Mizo an awm na a hnam tlem zawk, a bikin Chakma thalaite'n diltu an tam hle a ni.

<><><>

TOURISM

Tourism Minister Pu Lalnghinglova Hmar chuan Mizoram flawhtu an pun nasat thu sawiin hei hian Mizoram ei leh bar dinhmunah a tha zawngin nghawng a nei chho zel dawn tih a sawi.

Inrinni zana Ignite Studio, Aizawla LESDE UPSC Challenge Inter College Quiz Competition 2025 kharna hun a hmanpuinaah he thu hi sawiin Minister chuan kum 2023-2024 chhungin Mizoram flawhtu chu mi nuai 2 sing 1 sang 9, 114 an nih thu leh kum 2024-2025-ah chuan mi nuai 5 sing 2 sang 4, 784 an nih thu a sawi a. A punna chu mi nuai 3 sang 5, 670 a nih thu leh hei hi za zela chhut chuan 139.5 in an pun thu a sawi a. A chhan tam tak zinga pakhat phat rual loh chu Manipur buai avanga lut chhuak an tam vang a ni a ti. Chumi piah lama thil chiang tak chu Mizoram flawhtu nasa takin an pung a, Mizoram ei leh bar dinhmunah a tha zawngin nghawng a nei chho zel dawn a ni a ti bawk.

Tourism lamah hma sawn zel an tum tih sawiin Minister chuan tunah hian an sorkar hnuah project hrang hrang, cheng nuai ‘singthum sangnga zasarih sawmkua pariat point pahnih pahnih’ project an neih thu sawiin an thawh mek leh thawh chhoh tur, sorkar laipui atanga an dawn deuh vek a nih thu a sawi a. Tourism-a awmze nei lehzuala kal a nih theih nan kum 2026 atangin tourist calendar neih ni se tia an rel thu a sawi a. Mizoram flawh tum ten eng nge kum khat chhungin eng ang hun hrang hrang nge huaihawt a nih dawn tih an hriat lawk theihna tur a nih thu a sawi a ni.

<><><>

CAG: PROXIES

Comptroller & Auditor General of India (CAG) audit report chuan Power & Eelectricity Department a hnathawk 6-te'n hna an thawk lo chung a hlawh cheng nuai 80 sing 8 leh sang 8 pek an ni chu na takin a sawisel.

CAG audit report a a lan danin power & electricity department a executive engineer (EE), power project division Champhai pisa thil chhin chhiahna April leh May 2023 an endikna-ah hnathawktu 6-te chuan hna thawk si lovin kum 2016 April thla leh kum 2021 Mar thla inkar bakah kum 2022 April leh kum 2023 February thla inkar chhung khan an hlawh a bikimin an la a. Kum 2021 April leh kum 2022 March thla inkar chhung a he pisa thil chhinchhiah dan chu auditor-te entir an ni lova. Hna an thawh loh chhung hian aikar an la tih auditor-te chuan an hmuchhuak. CAG-in a hmuhchhuah chu hna an thawh loh chhung hian an hlawh atanga cheng 9,000 atanga cheng 10,000 theuh chu lak thensak an ni a, an aikalte hnena pek a ni a. A vaia tlingkhawm chu cheng nuai 17, sing 4 leh sang 8 zet a ni. Aikal an lak hian thuneitute phalna leh remtihna lak a awm lova. Fundamental Rules (FR) rule 17(1) bawhchhijatna a ni. A chhan chu he rule-ah hian officer tu pawh thuneitu phalna la lova hna chawlsan chu hlawh emaw allowance emaw pek loh tur tih a ni.

He ti chung chuan dan kalhin sorkar hnathawk 6-te hian an hlawh chu a bikimin an la a, thawk lo chuan hlawh a nei tur a ni lo (No Work, No Pay)

thuthlung bawhchhiatna a ni. Kum 2024 February thla khan Champhai EE chuan audit zawhna chhangin he'ng hnathawkte hi phalna la hmasa lovin an chawl a, an aikalte hi anmahni mimalin an ruahman a ni an ti a. An pisa hian aikalte theuh hlawh tur hi an hlawh atangin an lo lak thensak a ni tiin EE chuan a sawi a, hei hi a nih avangin sorkar hnathawkte an inrawlh tih a Chiang Hle. Sorkar chuan kum 2024 February ni 23-a a chhanna-ah audit thil hmuhchhuah hi a hriatpui thu leh chhui chian mek a nih thu a sawi a. Tuna he'ng mi 6 zinga hna la thawk mekte hian an hna hi an zawm leh tawh a, aikala an lak chhunzawm lo a ti a ti bawk.

He tiang hi sorkarin a sawifiahna chu ni mah sela hna thawk lo chungah hlawh pek tho an nih hi hmuhlet/laklet a ni em tih leh sorkar hnathawkte chungah hremna lek a ni em, an thurualpui sorkar hnathawk dangte lakah pawh hremna lek a ni em tih tarlan a ni lo. Kum 2024 September ni 25-a sorkar a insawifiahna-ah chuan he'ng official 6-te hian natna chi hrang hrang Alzheimer's, ngawr natna leh zunthlum te an vei a, an hlawh hi chhuhsak a laklet sak a nih chuan hnathawkte bakaha an chhungte'n sum leh pai-ah harsatna an tawh dawn avangin chhuhsak an ni lo a ni, tih a ni.

Sorkar insawifiahna hi CAG chuan a pawm lova, a chhan chu phalna awm lova hna chawlhsan hi Financial Rules a hlawh hmuh theihna dan a kalh a. Rawtna siam nawnin department leh sorkar hian an hna thawk lova chawl ringawt sorkar hnathawkte hlawh lo pek tawh hi chhuhsak leh turin a ti a. Chu bakah Police-ah ziaka thlenin dan anga an chungah hremna lek turin a ti a. Thuneitu dik takin phalna a pek lohva aikala lak hi dan bawhchhiatna a ni tih Chiang takin CAG chuan a report-ah a ziake lang bawk a ni.

<><><>

GST 2.0

Sorkar laipuiin GST rate thar a duan chuan insakna bungraw manah a tam zawkah nghawng lo mahse bungraw thenkhat man tlawm chauh pawhin mipuite nasa takin a chhawk zangkhai dawn tih bungraw zuartuten an sawi.

Insakna bungraw hrang hrang zuartute chuan Akashvani zawhna chhangin an bungrua tam zawk chu GST rate thar in a nghawng loh, a man ngai anga la hralh tur a nih thu an sawi a. A hmaa GST zaa 18 chu bungrua zaa 90 chuangah chuan zaa 18 a la nih chhunzawm zel thu an sawi a. Bungraw thenkhat, leilunga awmsa lakchhuah natural stone - granite leh marble a hmaa zaa 18 ni thin zaa 5 ah a tlakhniam thu an sawi a. Thing tak hmanga siam furniture hrang hrang man pawh a tlakhniam thu an sawi a. Choka siamna bungraw thenkhat man a tlakhniam thu an sawi bawk a ni.

Insakna bungraw zingah cement man tlema a tlakhniam thu bungraw zuartute chuan an sawi a. Steel rod-ah chuan danglamna a awm lo tih sawiin balu leh brick-ah pawh danglamna a awm lem loh thu an sawi a ni. Electric bungraw zuartute chuan bungraw man tlawm a awm nual dawn thu an sawi bawk a. A tlangpuiin an bungraw man danglam dawn lo mahse an bungraw thenkhat tlawm ringawt avang pawhin mipuite sum sen tur tam tak a hniam phah dawn tho tih an sawi a ni.

<><><>

SYNOD REHAB

Kumin May thlaa Aizawl Kulikawn veng mi, Pu Vanlalngaia'n Hlimen Chuhvela a ram Mizoram Synod hnena a pek chu tang chhuak baihvai te leh ruihhlo ngaite enkawlna hmun, Khawngaihna In, Chite venga awm mek tan hman tir a ni dawn.

Tunhnaia Synod Information lamin thu an chhuah danin Synod Prison Ministry-in a thawhpui mek, jail tang chhuak, hawna tur nei lo leh khawlaia tal mai maite enkawlna hmun Khawngaihna In, Chite venga mi chu an hmunhma-in a zawh tawh loh avanga Pu Vanlalngaia'n Synod hnena ram a pek chu hman hawh dilpui a nih thu an tarlang a. Synod Prison Ministry leh Khawngaihna In thawhho dante, Khawngaihna In dinhmun leh hmun hma an mamawh dante ngahtuahin Synod Executive Committee Vawi 314-na chuan an dilna a remtih thu tarlan niin Pu Vanlalngaia'n Synod tana ram a pek chu Khawngaihna In hian an hmang dawn ta tih an sawi a ni.

Mizoram Synod thuchhuak chuan Pu Vanlalngaia ram awmna hmun chu jail tang chhuak, hawna tur nei lote enkawlna atana duhthusam, hmun fianrial, chakkhai lamna hla lutuk si lo a nih thu an sawi a. Synod Prison Ministry-in a thawhpui Khawngaihna In chu Chite veng aṭangin Hlimen ramah hian sawn a ni dawn tih an tarlang bawk a ni.

Pu Vanlalngaia'n Mizoram Synod hnena a ram pek hi bigha 7 leh a chanvea zau niin thalai chhanchhuah ngai te chhanchhuah beihpui thlak a nih theih nan kohhranin hma la se a duh thu leh chumi rilru pu chung a ram chu pe a nih thu ram an inhlan laiin a lo sawi tawh a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.
<><><>

PM

Prime Minister Narendra Modia chuan ram intodelh chu ramchhung thilsiam lei tam chauhin a theih a ni a ti. Mann Ki Baat programme ah he thu hi sawiin Pu Modia chuan kutpui lo thleng turah hian ramchhung thilsiam lei uar turin a chah a. Hei bakah hian hunpui lo thleng turah mipuite chu faina ngai pawimawh tur a ngen bawk a ni.
<><><>

SEVA PARV

Mipui rawngbawl leh sawrkar inrelbawlna tha thupuia neiin Prime Minister Narendra Modia hnuaiah ramchhungah hmasawnna tam tak thlen mek a ni. Tun tum Seva Parv hunah chuan Modia sarwkarin hmasawnna ruhrel thlen tura PM GatiShakti National Master Plan chungchang tarlang ila. PM Modia hnuaiah hian India rama hmasawnna ruhrel ten nasa takin hma an sawn. He hmasawnna phena pawimawh tak chu PM GatiShakti hmalakna hi a

ni a, he hmalakna hmang hian ramchhunga PM Modian India hmasawnna tura a hmathlir atakin tihhlawhtlin a ni a. Pu Modia chuan PM Gati Shakti chu hmasawnna huapzo a nih thu a sawi.

<><><>

ASIA CUP

Nizana Asia Cup final khelh zawh takah India chuan Pakistan wicket ngaa hnehin an champion. Dubai International Cricket Stadium-a inkhelah India chuan Asia Cup pakuana an la a. He tournament ah hian India chuan Pakistan hi tum thum hmachhawnin a hneh vek a ni.

<><><>